

Izjava: Izmirenje stare devizne štednje mora biti fiskalno održivo te osigurati štedišama povrat sredstava u najvećem mogućem iznosu

Danas se prvi zamjenik visokog predstavnika Larry Butler u OHR-u sastao sa ministrom financija FBiH Dragom Vrankićem, sa kojim je, između ostalog, razgovarao o izmirenju obaveza po osnovu stare devizne štednje.

Ambasador Butler još jednom je izrazio podršku OHR-a važećem Zakonu o izmirenju obaveza po osnovu stare devizne štednje BiH, čije osnovne odredbe i dalje predstavljaju najodrživiji okvir za isplatu duga velikoj većini štediša u što kraćem vremenskom roku.

Ambasador Butler je pozdravio mišljenje koje je Ministarstvo financija i trezora dostavilo Vijeću ministara 7. novembra 2006. godine, u kome je fiskalni efekat koji postojeći aranžman za izmirenje stare devizne štednje ima na budžet upoređen sa efektom koji bi imali amandmani koje je predložio Tihomir Gligorić, a koji se i dalje nalaze pred Domom naroda BiH. U tom mišljenju se, između ostalog, procjenjuje da bi kamatne stope predviđene predloženim amandmanima bile fiskalno neodržive – organi vlasti BiH nemaju resurse za njihovu isplatu.

Ambasador Butler i ministar Vrankić su se složili da izmirenje stare devizne štednje mora biti fiskalno održivo te osigurati štedišama povrat sredstava u najvećem mogućem iznosu.

U tom kontekstu, oni su razgovarali i o nedavnoj odluci

Evropskog suda za ljudska prava u predmetu Jeličić protiv BiH, u kojoj se navodi da se stalnim odlaganjem izvršenja sudskog rješenja u korist podnosioca tužbe krše obaveze Bosne i Hercegovine iz Evropske konvencije o ljudskim pravima. Ambasador Butler je konstatovao da, iako ta odluka nema implikacija na veliku većinu štediša, ministarstva financija u cijeloj BiH moraju pod hitno napraviti procjenu broja i ukupnog iznosa koji se mora isplatiti u skladu sa pravosnažnim sudskim rješenjima u slučajevima stare devizne štednje te osigurati njihovo izvršenje u skladu sa ovom odlukom.

Osim o ovim sudskim odlukama, ambasador Butler i ministar Vrankić razgovarali su i o stalnom rastu rashoda u Federaciji, koji su predviđeni ne vodeći računa o fiskalnoj održivosti.